

Dapi 40 onns datti Pro Litteris

Ediziun speziala da l'organ «GAZZETTA»

■ (anr) Uonn po la Pro Litteris, la societad svizra per ils dretgs d'autur per la litteratura e l'art figurativ, festivar ses 40. anniversari. A quai renda ses organ «GAZZETTA» attent cun ina gist cumparida ediziun speziala. L'emprim numer da questa revista è vegnì edì 1986. Fin uss èn 55 numers vegnids publicgads. Davent da la 11. ediziun èn tuttas ediziuns vegnidas deditgadas ad in tema specific che ha da far en in vast senn cun la lavur creativa dals commembers da Pro Litteris. Sco auturs n'han ins betg pudì engaschar be spezialists en lur rom, mabain era impurtantas personalitads. La «GAZZETTA» è pia la carta da visita da Pro Litteris.

Per l'ediziun giubilara han ins envidà 30 personalitads da far patratgs davart Pro Litteris insumma, vegnida fundada 1974, pia avant 40 onns. Pro Litteris è ina da las tschintg societads svizras che sefatschenta da trair a niz ils dretgs da l'autur sin ils

champs da la litteratura, fotografia e l'art figurativ.

Vuschs or dal Grischun

Tranter ils auturs da la ediziun speziala per 40 onns Pro Litteris sa chatta era *Iso Camartin*. Sut il titel «A tgi deditgesch jau i?» tschenta el la dumonda: a tge serva quai. Ed el suppona che inagiada haja l'autur sez il pli bler da quai ch'el scrivia. Mo tschert è ch'el vul fascinar ses lecturs, uschia che scriber daventia il plaschair da pudair regalar.

In ulteriur autur grischun, *Silvio Huonder*, ha scrit gugent ed era renconuschen-tamain davart ses lungs contacts cun Pro Litteris che s'engascha per ils dretgs dals auturs ed artists. Sias ponderaziuns èn perquai intituladas cun «Bunamain ina declaraziun d'amur». Igl è bel ch'i dat Pro Litteris ed el stima fitg quai ch'el ha retschavì da la giubilara.

